

La communitad è sa midada

Alain Berset: 100 dis en uffizi

DA LUCAS DEPLAZES / ANR

■ **Suenter trais mais sco commember dal cussegl federal è sa preschentà Alain Berset a las medias. Tar las refurmas da las ovras socialas stoppia la politica tegnair quint da las midadas en nosa communitad.** El sa sentia fitg bain en sia nova funcziun sco schef dal Departament federal da l'intern, ha sincerà *Alain Berset* ier davant las medias a Berna. Da chasa en ses departament èn las ovras socialas, il sector da la sanadad e las dumondas da la furmazion e da la cultura. Las mesiras che prenda ses departament pertutgan giuven e vegl, ha constata Berset. En discussiun cun il pievel haja el remartgà il basegn central da la populaziun, la segirtad, principalmain la segirtad da las ovras socialas. Quellas èn fundadas sin il princip da solidaritad tranter las generaziuns. Mintgin contribuescha e mintgin po retrair. Finamira da las ovras socialas è da garantir a giuven e vegl da pudair viver en tutta dignitad umana, ha punctuà Berset.

Refurmas èn necessarias

L'Assicuranza per vegls e survivents (AVS) e las cassas da pensiu muntan las pitgas socialas las pli impurtantas da la Svizra. L'AVS – che ha cuntanschì il 64avel onn d'existenza – na basegna per ils proxims onns naginas contribuziuns supplementaras. Las cassas da pensiu èn obligatorias



dapi ina generaziun. Ina reducziun da la tariffa da conversiun na saja betg urgenta, ha confermà Berset. Il minister da las ovras socialas ha fatg attent a las midadas dals ultims onns en nosa communitad, sco l'evoluziun demografica, la situaziun sin il martgà da finanzas e l'integrasiun da las dunnas en il process da lavur. La pli gronda part da las dunnas exercitescha oz ina activitad professiunala, almain a temp parzial. En l'avegnir vegn ina part dals maridads a

retrair duas pensiuns. Questa nova situaziun dettia uss la chaschun da reponderar la funcziun dad omaduas ovras socialas ord vista pli globala. Ils ultims onns na saja quai betg reussì da realisar refurmas essenzialas. Refurmas tar quellas ovras socialas – per exempel ina flexibilisaziun da la vegliadetgna da renta – èn dentant necessarias, ha constata Berset. Per tschertgar schliaziuns avain nus anc temp. Berset vul nizegiar quest spazi per ina discussiun appro-

fundada cun tut ils partenaris socials e cun ils exponents da la politica. Necessary saja da sclerir la dumonda, tge pretsch è nosa communitad pronta da pajer en l'avegnir per las ovras socialas?

Assicuranza d'invaliditad

La revisiun da l'Assicuranza d'invaliditad (AI) haja realisà las finamiras. Dapi l'onn 2006 èn sa reducids ils cas d'invaliditad. Er l'integrasiun da var 17 000

persunas cun ina renta AI saja sin buna via, grazia a la pontadad da l'economia da crear posts da lavur per quellas persunas. Cun l'augment limità da la taglia sin la plivalur possia l'AI vegnir distgargiada fin l'onn 2017. En discussiun è uss la revisiun 6b che duai procurar per in quint equilibrà a partir da l'onn 2017.

Cassa da malsauns

Sin il sector da la sanadad sajan ils chantuns ils acturs principals. Berset vul cuntnuar cun la discussiun e procurar per dapli trasparenza. El ha constata in augment considerabel dals tractaments ambulants er en ils ospitals. Quest svilup haja consequenzas sin las premias, perquai ch'ils chantuns na surpiglian nagins custs per il tractament ambulants. La nova lescha davart la suvegianza da las cassas da malsauns lubeschia al cussegl federal d'intervegnir pli svel. Per l'onn 2013 vul Berset sutmetter al parlament ina strategia per giuditgar meglier la qualitat dals ospitals.

Cultura

Davart la critica fundamentala dal directur da Pro Helvetia ha Berset betg prendì posiziun. «La cultura na duai betg vegnir consumada, quella duain ins viver!» El veglia promover la musica tar la giuventetgna. La cultura saja er la basa impurtanta per la coesiun naziunala, è persvas Berset.

Suenter 100 dis sco commember dal cussegl federal ha Alain Berset tratg ier in'emprima bilanza. Tar las refurmas da las ovras socialas stoppia la politica tegnair quint da las midadas en nosa communitad. KEYSTONE